

BOSNA I HERCEGOVINA  
FEDERACIJA BOSNE I HERCEGOVINE  
TUZLANSKI KANTON  
**OPĆINSKI SUD U TUZLI**  
**Broj: 32 0 St 494709 25 St**  
Tuzla, 13.04.2026.godine

Općinski sud u Tuzli, sudija Antonela Đaković, kao stečajni sudija, u postupku prethodnog ispitivanja prijedloga za pokretanje stečajnog postupka nad dužnikom "ENNAL-STIL" d.o.o. za proizvodnju, trgovinu i usluge Gradačac, PRESTANAK, ul. Požaričkih branilaca bb, Gradačac, dana 13.04.2026. godine, donio je

## **RJEŠENJE**

JAVNO SE POZIVAJU predlagač, povjerioci i sva zainteresovana lica da u roku od 30 (trideset) dana od dana objavljivanja rješenja u Službenim novinama F BiH predlože otvaranje stečajnog postupka i na depozitni račun Suda, broj: 132-100-03091233-91 NLB banka dd Sarajevo, predujme iznos od 4.000,00 KM, na ime obezbjeđenja troškova stečajnog postupka nad dužnikom "ENNAL-STIL" d.o.o. za proizvodnju, trgovinu i usluge Gradačac, PRESTANAK, ul. Požaričkih branilaca bb, Gradačac, te da dokaz o izvršenoj uplati dostave sudu pozivom na broj predmeta.

Ukoliko u ostavljenom roku niko od pozvanih ne predloži otvaranje stečajnog postupka i ne uplati određeni predujam, sud će donijeti Rješenje o otvaranju i istovremenom zaključenju stečajnog postupka.

Ako zainteresovana lica predlože otvaranje stečajnog postupka i uplate određeni predujam u navedenom roku, sud će otvoriti stečajni postupak i voditi ga u skladu sa odredbama Zakona o stečaju.

Rješenje će biti objavljeno u Službenim novinama F BiH, web stranci suda i oglasnoj ploči suda.

## **Obrazloženje**

Sud je dana 26.11.2025.godine pokrenuo prethodni postupak radi utvrđivanja uslova za otvaranje stečajnog postupka nad imovinom privrednog društva "ENNAL-STIL" d.o.o. za proizvodnju, trgovinu i usluge Gradačac, PRESTANAK, ul. Požaričkih branilaca bb, Gradačac, a za privremenog stečajnog upravnika imenovana je Merlina Imamović iz Lukavca, ul. Braće Zaimovića broj 26, Puračić. Dana 02.02.2026.godine privremeni stečajni upravnik je dostavio Izvještaj o provedenom prethodnom stečajnom postupku. Sud je dana 09.04.2026.godine zakazao ročište radi razmatranja navedenog izvještaja i utvrđivanja uvjeta za otvaranje stečajnog postupka nad dužnikom "ENNAL-STIL" d.o.o. za proizvodnju, trgovinu i usluge Gradačac, PRESTANAK, ul. Požaričkih branilaca bb, Gradačac.

Iz izvještaja privremenog stečajnog upravnika proizilazi da je djelatnost društva za koju je društvo bilo osnovano proizvodnja obuće, a društvo je osnovano 2015. godine. Iz izvještaja, nadalje, proizilazi da dužnik ne posjeduje vlastite poslovne prostorije. Sva dokumentacija se nalazila kod direktora, a od finansijske dokumentacije privremeni stečajni upravnik je imao na raspolaganju Bilanse stanja i Bilanse uspjeha za period od 2023. godine do 2025. godine. Prema izjavi direktora društva, društvo je zapalo u poteškoće od 2018. godine i svoju osnovnu djelatnost ne obavlja od 01.01.2020.godine. U periodu 2023.-2025. godine iz bilansa uspjeha je vidljivo da društvo ne ostvaruje prihod od djelatnosti zbog koje je osnovano. Nadalje,

utvrđeno je da društvo nije vlasnik niti jedne nekretnine. U društvu nema zaposlenih lica. Porezna uprava F BiH, porezna ispostava Tuzla izdala je listu zaposlenih lica za obveznika na dan 13.01.2026. godine prema kojoj kod navedenog obveznika nema evidentirano niti jedno osigurano lice. Služba za geodetske i imovinsko-pravne poslove Grada Gradačac je 05.12.2025. godine izdala uvjerenje u kojem se potvrđuje da „ENNAL-STIL“ d.o.o. za proizvodnju, trgovinu i usluge Gradačac je upisan kao nosilac prava u katastarskom operatu Posjedovni list broj 5260 sa slijedećim podacima: parcela 486/8, naziv GLINIŠTE, oranica /njiva 6.klasa, površine 333 m<sup>2</sup>. Dana 13.01.2026.godine u razgovoru sa ovlaštenim licem i na osnovu dodatno dostavljene dokumentacije je utvrđeno da je navedena katastarska parcela GLINIŠTE od 333 m<sup>2</sup> prodana 25.09.2025. Kao dokaz ovoj tvrdnji dostavljen Otpравak izvornika 959/2025 izdat od notara Adnan Jašarević iz kog je vidljivo da je došlo do kupoprodaje navedene parcele. Kupac je bio dužan uplatu izvršiti u korist Kantonalnog poreznog ureda Tuzla na osnovu ranije uknjižene hipoteke na predmetnoj imovini. Zemljišnoknjižni ured Općinskog suda u Gradačcu je 12.01.2026. godine je izdao Zemljišnoknjižni izvadak kojim je utvrđeno da pravno lice „ENNAL-STIL“ d.o.o. za proizvodnju, trgovinu i usluge Gradačac, se vodi kao vlasnik parcele GLINIŠTE sa navedenim teretima u dijelu C u koji su evidentirana Riješenja o upisu Hipoteke na navedenoj parceli u korist Kantonalnog Poreznog ureda Tuzla i Uprave za indirektno oporezivanje, Regionalni Ured Tuzla. Nadalje, Ministarstvo unutarnjih poslova TK- Odsjek za administraciju Gradačac, na osnovu zahtjeva „ENNAL-STIL“ d.o.o. za proizvodnju, trgovinu i usluge Gradačac, izdaje Uvjerenje 25.12.2025.g., kojim potvrđuje da je društvo nije vlasnik motornih vozila. Centralna banka Bosne i Hercegovine dostavila je Izvještaj o računima poslovnog subjekta na dan 02 .10.2025. godine prema kojem su svi računi ugašeni ili blokirani. Što se tiče poslovanja društva, isto je u posljednje tri godine nerentabilno i neekonomično, dužnik je u periodu od 2023. godine do 9 mjeseca 2025. godine poslovao bez ostvarivanja prihoda. Prema podacima iz bilansa stanja na dan 31.12. 2023. godine akumuliran gubitak iskazan je u istom iznosu od 0,00KM . Kada su u pitanju obaveze društva, jasno je da one prema knjigovodstvenoj evidenciji iznose 0,00 KM. Na osnovu Uvjerenja izdatog od strane Porezne uprave F BiH, Kantonalni porezni ured Gradačac od 23.10.2025.g. vidljivo je da su navedene obaveze u iznosu od 360.574,76 KM. Na osnovu Uvjerenja Uprave za indirektno oporezivanje, regionalni centar Tuzla od 27.10.2025.godine navedeno je dugovanje od 19 731,78 KM. S obzirom na činjenično stanje imovine, društvo nema mogućnost nastavka poslovanja.

Na osnovu svega gore navedenog, evidentno je da postoji stečajni razlog za otvaranje stečajnog postupka, a prema Zakonu o stečaju FBiH, stečajni upravnik predlaže otvaranje i zaključenje stečajnog postupka jer nema imovine iz koje se mogu podmiriti troškovi vođenja stečajnog postupka kao ni za namirenje povjerilaca.

Stečajni dužnik a što proizilazi iz izvještaja i mišljenja privremenog stečajnog upravnika nije u roku od 60 dana od dana nastupanja platežne nesposobnosti podnio prijedlog za otvaranje stečajnog postupka.

Ispitujući prijedlog za pokretanje stečajnog postupka sud je utvrdio da je prijedlog za otvaranje stečajnog postupka dopušten i osnovan obzirom da je stečajni dužnik platežno nesposoban.

Cijeneći da su ispunjeni uslovi za otvaranje stečajnog postupka, a nakon provedenog prethodnog postupka i dostavljenog izvještaja privremenog stečajnog upravnika, te da je utvrđeno da stečajni dužnik nema imovine za podmirenje obaveza, sud je u smislu odredbe čl. 102 stav 7. Zakona o stečaju pozvao povjerioce i sva zainteresovana lica da izvrše uplatu

troškova finansiranja stečajnog postupka u visini od 4.000,00 KM iz kojih sredstava će biti finansirani svi troškovi stečajnog postupka (nagrada i naknada stečajnom upravniku, objavljivanje rješenja u službenim novinama, izrada pečata za društvo u stečaju, podnošenja finasijskih izvještaja nadležnim institucijama sve do postupka brisanja društva dužnika iz sudskog registra privrednih društava), obzirom da prema prijavi privremenog stečajnog upravnika društvo ne posjeduje imovinu.

Ukoliko povjerioci ili neko od zainteresovanih lica u ostavljenom roku ne izvrši uplatu predujma troškova za vođenje stečajnog postupka, sud će otvoriti stečajni postupak i odmah ga zaključiti u skladu sa odredbama člana 102. stav 8. Zakona o stečaju (Službene novine FBiH broj 53/21).

Odluka o dostavi rješenja i javnom oglašavanju putem oglasne ploče suda, WEB stranice Općinskog suda u Tuzli i javnog objavljivanja u Sl. Novina F BiH, zasniva se na odredbi člana 103. stav 8. Zakona o stečaju.

**Stečajni sudija**

**Antonela Đaković**

**POUKA O PRAVNOM LIJEKU:** Protiv ovog rješenja nije dozvoljena žalba